

La Lettre Jèrriaise

Bouônjour bouonnes gens. Ch'èrest mé, Geraint Jennings, tchi vos présente la Lettre Jèrriaise et aniet j'continuons l'histouaithe du fanmeux détecti Shèrlock Holmes dans l'Aventuthe du Bâtisseux d'Norwood:

"Pouortchi qu'lé dgeux brûl'lait l'cadâvre?"

"Ch'est en tchi, pouortchi qu'McFarlane lé f'thait?"

"À seule fin d'muchi tchique évidence."

"Ofûche lé dgeux voulait muchi qu'nou-s'avait commîns un meurtre en tout."

"Et pouortchi qu'lé dgeux n'en prînt rein?"

"Pa'ce qué ch'tait des papièrs qu'i n'pouvait pon bardgîngni avec."

Lestrade châtchit sa tête, mais i' m'sembliait qu'sa manniéthe 'tait mains absolument asseuthée qué d'vant.

"Eh bein Moussieu Shèrlock Holmes, ou pouôrez chèrchi vot' dgeux, et quandi qu'ous êtes pour lé trouver j'gardéthons not' homme. La fin du temps f'tha vaie tchi qu'a raison. Èrmèrtchiz chennechîn, Moussieu Holmes: autant qu'j'en sachions, autchun des papièrs n'en fut halé, et qu'lé prisonnyi est l'seul homme du monde tchi n'avait pon d'èrse pour en haler, vivyant qu'il en s'sait l'héthitchi et l's héthit'tait en tout cas."

M'n anmîn semblyit frappé par ch't' èrmèrque.

"Jé n'voudrais pon dénier qu'vot' évidence dé bort' en aut' souôtcheint fortément vot' théorie," qu'i' dit. "J'veurs raîque înditchi qu'i' y'a d'aut' théories dé pôssibl'ye. Coumme ou l'dites, la fin du temps f'tha tout vaie. À tantôt! J'dithais bein qu'duthant aniet j'pâss'sai par Norwood vaie coumme tchi qu'ous avanchiz."

Quand l'détecti s'en fut, m'n anmîn s'mâtit et s'griyit pour lé travas du jour auve la minne rêvilyie d'un homme tch'a eune tâche pliaîthante l'avant à li.

"Ma preunmié action, Watson," qu'i' dit, coumme i' s'abriait d'sa choutinne, "dait êt', coumme j'l'avais dit, d'aller du bord dé Blackheath."

"Et pouortchi pon Norwood?"

"Pa'ce qué j'avons dans ch't' affaithe un tchuthieux încident tch'est v'nu ès trouses d'un aut' tchuthieux încident. La police sont à faithe la faute dé lus concentrer l'attention sus l'deuxième, pa'ce qué ch'tî-là s'adonne lé chein tch'est dé vrai crînminné. Mais i' m'est évident qu'lé mouoyen logique dé s'appréchi d'l'affaithe et dé c'menchi d'êcliaithi la preunmié încident - chu drôle dé testament, écrit d'un vo, et dé tchi l'héthitchi est si innespéthé. I' pouôrait faithe dé tchi pour sîmplyifier chein tch'a sieu. Nânnîn, man vyî, jé n'crai pon qu'tu pouôrras m'aîdgi. I' n'y'a pon d'prospé d'dangi, autrément j'n'ôssais pon m'déhaler sans té. Jé m'fyie qué quand j't'èrvèrri à ces sé, j'pouôrrai t'rapporter qu'j'ai peu faithe dé tchi pour chu janne

înfortuneu, tchi s'est pliaichi souos ma protection."

I' 'tait tard quand m'n anmîn rentrit, et j'viyais d'un co dg'yi à sa fache halée et gênée, qu'lé grand espé auve tchi qu'il avait c'menchi n'avait pon 'té justifié. Pouor eune heuthe i' vîngnonnit sus san violon, en tâchant d'apaîsi ses esprits êchèrvélés. À la fin i' cliutit bas l'îstrument, et s'lanchit dans les dêfinnissâles dé ses m'saventuthes.

J'avons à lâissi là pouor achteu Lé Sieur Holmes et l'Docteu Watson. Jé vos souhaite eune bouonne semaine. Mercie bein des fais pouor m'aver êcouté. À bêtôt et à la préchain.